

Broj: 02-05-5831-6/13
Sarajevo, 12.03.2013. godine

Na osnovu čl. 22. i 24. stav 4. Zakona o Vladi Kantona Sarajevo ("Službene novine Kantona Sarajevo", broj: 24/03 - Prečišćeni tekst), Vlada Kantona Sarajevo, na 14. sjednici održanoj **12.03.2013.** godine, donijela je sljedeći

ZAKLJUČAK

1. Utvrđuje se Prijedlog zakona o izmjenama Zakona o novčanim podsticajima u poljoprivredi na području Kantona Sarajevo.
2. Predlaže se Skupštini Kantona Sarajevo da, u skladu sa Poslovníkom Skupštine Kantona Sarajevo ("Službene novine Kantona Sarajevo", broj: 41/12 – Drugi novi prečišćeni tekst) donese Zakon iz tačke 1. ovog Zaključka.

PREMIJER

Suad Zeljković

Dostaviti:

1. Predsjedavajuća Skupštine Kantona Sarajevo
2. Skupština Kantona Sarajevo
3. Premijer Kantona Sarajevo
4. Ministarstvo privrede
5. Evidencija
6. A r h i v a



web: <http://vlada.ks.gov.ba>
e-mail: vlada@vlada.ks.gov.ba
Tel: + 387 (0) 33 562-068, 562-070
Fax: + 387 (0) 33 562-211
Sarajevo, Reisa Džemaludina Čauševića 1



Bosna i Hercegovina
Federacija Bosne i Hercegovine
KANTON SARAJEVO

Prijedlog

ZAKON
O IZMJENAMA ZAKONA O NOVČANIM PODSTICAJIMA U
POLJOPRIVREDI NA PODRUČJU KANTONA SARAJEVO

Sarajevo, mart, 2013. godine

Na osnovu člana 18. stav (1) tačka b) Ustava Kantona Sarajevo (" Službene novine Kantona Sarajevo", br. 1/96, 2/96-Ispravka, 3/96-Ispravka, 16/97, 14/00, 4/01, 28/04 i 6/13) i u skladu sa članom 28. stav (4) Zakona o poljoprivredi ("Službene novine Federacije Bosne i Hercegovine", br. 88/07 i 4/10) Skupština Kantona Sarajevo, na sjednici održanoj _____ 2013. godine, donijela je

Prijedlog

**ZAKON
O IZMJENAMA ZAKONA O NOVČANIM PODSTICAJIMA U POLJOPRIVREDI NA
PODRUČJU KANTONA SARAJEVO**

Član 1.

U Zakonu o novčanim podsticajima u poljoprivredi na području Kantona Sarajevo ("Službene novine Kantona Sarajevo", broj 1/12) član 10. mijenja se i glasi:

" Član 10.
(Animalna proizvodnja)

U okviru animalne proizvodnje podstiče se:

- a) farma mliječnih krava koja je u sistemu otkupa mlijeka (provođenje veterinarsko-zdravstvenih, zootehničkih i zoohigijenskih mjera);
- b) farma mliječnih krava koja nije u sistemu otkupa mlijeka (provođenje veterinarsko-zdravstvenih, zootehničkih i zoohigijenskih mjera);
- c) vlastiti uzgoj teladi namijenjen daljem tovu (provođenje veterinarsko-zdravstvenih, zootehničkih i zoohigijenskih mjera);
- d) vlastiti uzgoj priplodnih junica za remont ili proširenje osnovnog stada mliječnih krava (provođenje veterinarsko-zdravstvenih, zootehničkih i zoohigijenskih mjera);
- e) farma za tov junadi (nabavka podmladka, provođenje veterinarsko-zdravstvenih, zootehničkih i zoohigijenskih mjera);
- f) farma ovaca (provođenje veterinarsko-zdravstvenih, zootehničkih i zoohigijenskih mjera);
- g) farma koza samo u stajskom uzgoju ili pod nadzorom u ograđenim prostorima (provođenje veterinarsko-zdravstvenih, zootehničkih i zoohigijenskih mjera);
- h) farma za tov svinja (nabavka podmladka, provođenje veterinarsko-zdravstvenih, zootehničkih i zoohigijenskih mjera);
- i) farma za tov piladi (nabavka jednodnevnih pilića, provođenje veterinarsko-zdravstvenih, zootehničkih i zoohigijenskih mjera);
- j) inkubacijska proizvodnja jednodnevnih pilića;
- k) farma koka nosilja (nabavka jednodnevnih ili osamnaestonedeljnih pilenki, provođenje veterinarsko-zdravstvenih, zootehničkih i zoohigijenskih mjera);
- l) pčelinjak (provođenje veterinarsko-zdravstvenih mjera);
- m) organizovani otkup svježeg mlijeka;
- n) proizvodnja sirove vune. "

Član 2.

Član 14. mijenja se i glasi:

“ Član 14.
(Model kapitalnih ulaganja)

(1) U okviru modela kapitalnih ulaganja podstiče se:

a) izgradnja objekata započeta u tekućoj godini sa završenim grubim građevinskim radovima preko 50 % i to:

1) štalskih kapaciteta za uzgoj goveda, ovaca, koza i svinja za upotrebnu površinu objekta u osnovici (tlocrtu) objekta;

2) štalskih kapaciteta za uzgoj peradi za upotrebnu površinu objekta;

3) za skladištenje, hlađenje ili sušenje primarnih poljoprivrednih proizvoda, koji su proizvedeni u okviru vlastitog poljoprivrednog gazdinstva za upotrebnu površinu objekta;

4) ribnjaka za upotrebnu površinu mrijestilišnih i uzgojnih bazena.

b) rekonstrukcija štalskih objekata za uzgoj goveda, ovaca, koza i peradi započeta u tekućoj godini sa završenim grubim radovima za upotrebnu površinu objekta u osnovici (tlocrtu) objekta, a u cilju usklađivanja s Pravilnikom o mjerama za unapređenje stočarske proizvodnje na području Kantona Sarajevo (“Službene novine Kantona Sarajevo” broj 19/10) (u daljem tekstu: Pravilnik o mjerama unapređenja stočarske proizvodnje).

(2) U okviru modela kapitalnih ulaganja podstiče se kupovina u tekućoj godini:

a) poljoprivrednog zemljišta isključivo za poljoprivrednu proizvodnju, a u cilju povećanja poljoprivredne proizvodnje;

b) novog staklenika ili plastenika;

c) nove poljoprivredne mehanizacije i priključnih sredstava;

d) nove opreme u biljnoj i animalnoj proizvodnji;

e) priplodnih junica za formiranje ili proširenje osnovnog stada mliječnih krava.”

Član 3.

(Stupanje na snagu)

Ovaj Zakon stupa na snagu osmog dana od dana objavljivanja u "Službenim novinama Kantona Sarajevo".

**PREDSJEDAVAJUĆA
SKUPŠTINE KANTONA SARAJEVO**

Prof. dr. Mirjana Malić

O B R A Z L O Ž E N J E

PRAVNI OSNOV

Pravni osnov za donošenje ovog zakona sadržan je u članu 18. stav (1) tačka b) Ustava Kantona Sarajevo ("Službene novine Kantona Sarajevo", br. 1/96, 2/96-Ispravka, 3/96-Ispravka, 16/97, 14/00, 4/01, 28/04 i 6/13) i članu 28. stav (4) Zakona o poljoprivredi ("Službene novine Federacije Bosne i Hercegovine", br. 88/07 i 4/10).

RAZLOZI ZA DONOŠENJE

Potreba za donošenjem Zakona o izmjenama Zakona o novčanim podsticajima u poljoprivredi na području Kantona Sarajevo ogleda se u sljedećim činjenicama:

Osnovni način davanja podsticaja po ovom Zakonu je provođenje zootehničkih, zoohigijenskih i veterinarsko-zdravstvenih mjera na farmama. Međutim u članu 10. važećeg zakona u nekim proizvodnjama izostavljene su zoohigijenske mjere, a kod veterinarskih usluga riječ zdravstvene, te se iste dodaju u Zakonu o izmjenama Zakona o novčanim podsticajima u poljoprivredi na području Kantona Sarajevo, za određene vidove animalne proizvodnje.

U članu 10. dodaje se nova tačka b) koja glasi: "farma mliječnih krava koja nije u sistemu otkupa mlijeka (provođenje zootehničkih, zoohigijenskih i veterinarsko-zdravstvenih mjera)". Novim vidom podsticaja bio bi obuhvaćen veliki broj proizvođača mlijeka na području Kantona Sarajevo koji nisu u sistemu organizovanog otkupa. Stoga smatramo neophodnim podsticaj za ovaj vid proizvodnje kako bi proizvođači koji nisu u mogućnosti da prodaju mlijeko registrovanom otkupljivaču, ostvarili podsticaj za svoju proizvodnju i imali iste predispozicije za proizvodnju kao i oni koji su u sistemu otkupa mlijeka.

Izmjena člana 14. stav (1) tačka a) podrazumijeva davanje podsticaja za izgradnju novih objekata po m², umjesto davanja podsticaja za rentu kako je propisano važećim zakonom. Naime, izgradnja objekata za primarnu poljoprivrednu proizvodnju je osnova za bavljenje poljoprivredom, posebno ako imamo u vidu činjenicu da većina postojećih objekata ne zadovoljava ni minimum uslova koje farme trebaju ispunjavati po standardima EU. Postojećim Zakonom podstiče se plaćanje rente za uređenje građevinskog zemljišta za izgradnju objekata, a taj je iznos znatno niži od iznosa koji bi farmeri ostvarivali, ako bi se podsticaji dobivali za površinu izgrađenog objekta. Ovakav vid podsticaja, kako je propisano važećim zakonom nije motivirajući za poljoprivrednike da grade nove objekte. Isto se može zaključiti iz podataka o realizaciji ovog vida podsticaja u 2012. godini u kojoj je podnesen samo jedan zahtjev za izgradnju objekata, dok je u prethodnim godinama tj. kada se podsticaj ostvarivao za površinu izgrađenog objekta, prosječno građeno po sedam objekata u toku godine. Naglašavamo da navedena izmjena, odnosno ovaj vid podsticaja ne bi bio u koliziji sa federalnim zakonom o podsticajima.

U stavu (2) ovog člana mijenjaju se tačke c) i d) u smislu razdvajanja mehanizacije (kojoj se dodaju i priključna sredstva) i opreme, iz razloga što su mehanizacija i priključna sredstva ista za biljnu i animalnu proizvodnju, dok se oprema razlikuje za te dvije proizvodnje. Takođe se u stavu (2) dodaje nova tačka e), kojom se omogućuje ostvarivanje podsticaja za kupovinu priplodnih junica za formiranje ili proširenje osnovnog stada mliječnih krava. Formiranje ili proširenje osnovnog stada mliječnih krava je investicija koja za svako gazdinstvo predstavlja ulaganje u proizvodnju. Ovakav vid ulaganja spada u red najbitnijih

investicija koje traže i najveća ulaganja, te je stoga neophodna podrška ovakvom vidu kapitalne investicije.

Obzirom da nije u pitanju složen i obiman zakon, predlaže se Skupštini Kantona Sarajevo, da u skladu sa članom 158. Poslovnika Skupštine Kantona Sarajevo (“Službene novine Kantona Sarajevo”, broj 41/12 – Drugi novi prečišćeni tekst), donese Zakon o izmjenama Zakona o novčanim podsticajima u poljoprivredi na području Kantona Sarajevo, po skraćenom postupku.

PRAVNA RJEŠENJA

Član 1. - Izvršene su u članu 10. sljedeće izmjene:

- novom tačkom b) uvodi se podsticaj za novi vid proizvodnje, odnosno podsticaj za farme mliječnih krava koje nisu u sistemu otkupa mlijeka,
- briše se tačka e),
- u tačkama a), b), c), d), e), f), g), h), i) i k) dodaju se riječi: “provođenje veterinarsko-zdravstvenih, zootehničkih i zoohigijenskih mjera”,
- u tački l) mijenja se formulacija podsticaja te sada ona glasi: “provođenje veterinarsko – zdravstvenih mjera”. Izmjene su izvršene iz razloga što je podsticaj za nabavku opreme sada omogućen u izmjenjenom članu 14. stav (2), dok nabavku lijekova smatramo veterinarsko - zdravstvenom mjerom, tako da je ista time obuhvaćena.

Član 2. - Izvršene su u članu 14. sljedeće izmjene:

- stav (1) tačka a) mijenja se u smislu davanja podsticaja. Naime, u važećem zakonu podsticaj je davan za plaćanje rente za uređenje građevinskog zemljišta za poljoprivredne objekte, dok se ovim izmjenama podsticaj daje za izgradnju objekta,
- stav (1) tačka b) mijenja se u smislu davanja podsticaja za upotrebnu površinu koja je predmetom rekonstrukcije,
- u stavu (2) razdvojeni su pojmovi mehanizacije i opreme, tako da je tačkom c) propisan podsticaj za nabavku mehanizacije i priključnih sredstava, a tačkom d) nabavka opreme za biljnu i animalnu proizvodnju, a dosadašnji sadržaj tačke e) sada je sadržan u tački d).
- u novoj se tački e) dodaje novi podsticaj za kupovinu priplodnih junica za formiranje ili proširenje osnovnog stada mliječnih krava.

Član 3. - Utvrđuje se rok za stupanje na snagu ovog Zakona.

SREDSTVA ZA PROVOĐENJE ZAKONA

Za provođenje ovog Zakona nisu potrebna dodatna finansijska sredstva iz Budžeta Kantona Sarajevo.

[DOPUNSKI MATERIJAL](#)